

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



PM-DAJ GUA

Vawiin khan DC Conference hall, Saitualah, district Bawrhsap Dr. Lalngura Tlau chuan tribal mite tana hmasawna tura sawrkar laipui hmalakna PM Dharti Aaba Janjatiya Gram Utkarsh Abhiyan (DAJ-GUA) chungchang inzirtirna leh inhrilhhriatna, ni 15 chhung awh tur "Dharti Aaba Janbhagidari Abhiyan-Awareness & Saturation camp" a hawng.

He hunah hian Pu Lalngura Tlau chuan thu a sawi a, Ministry of Tribal Affairs hnuaiah PM-DAJ GUA ruahmanna hman tein tribal mite chawikanna leh hmasawna kalpui a ni tih sawiin, Saitual District-ah pawh khaw 40 zingah khaw 32 chu he ruahmanna hian a huam a ni, a ti. Bawrhsap chuan heng khua-ah te hian hmasawna hrang hrang tribal hostel leh tribal market centre sakna tur te kalpui tum a ni tih a sawi a, he scheme hman hian Saitual District- ah hmasawna a thlen ngei a beisei thu a sawi baw. Bawrhsap chuan hmasawna chu a mamawhte hnena a thlen ngei theih nan he awareness campaign-ah hian mipuite tana sawrkarin scheme hrang hrang a chhawp chhuah te hrilhhriat bakah mipuite an kawtkai puih (service delivery) te a pawimawh dawn a ni tih sawiin, kalkhawmte chu hemi kawngah theih tawp chhuah turin a fuih baw a ni.

PM DAJ-GUA hi nikum October ni 2 khan Prime Minister Narendra Modi chuan Jharkhand-ah a lo hawng tawh a. He ruahmanna-ina a tum chu tlangmi zinga harsa zual te kawng hrang hranga chawikanna leh hmasawna tura hmalak ni-in, hemi chungchang inzirtirna leh inhrilhhriatna 'awareness campaign' hi khaw hrang hrangah June ni 15 leh ni 30 chhunga kalpui tur a ni. He hunah hian awareness campaign mai bakah mipuite chu an mamawh ang service te a mawhphurtu sorkar department-te'n an kawtkai-ah an chhawp chhuahsak dawn a ni.

BSI

Lawngtlai Council Vengah Bible Society of India (BSI) Lawngtlai branch in an din, Good News Centre chu Bible Society of India, Aizawl Auxiliary secretary Rev.Remlalfaka'n nimin khan a hawng.

Good News Centre kawta ha hawna inkhawm hi Lawngtlai Branch BSI president Revd. H. Sangliana'n a kaihruai a, secretary Upa K.Zozamlia'n report pe in, he in an sakna hmun hi mimal ram Cheng nuai nga a an lei a nih thute, a in chhawng thuma sang sakna atana an senso zawng zawng chu cheng nuai sawmthum, singthum, sang sarh leh sawmriat a nih thu a tarlang a. Hetianga Bible Society in in a sak theihna chhan hi kohhran hrang hrang leh mimal inpekna vang a nih thu a tarlang baw. A panna kawng an leh kawng chung chiah hi BSI pisa tur atana ruahman niin, chhawng chung ber leh a hnua chiah hi mimalin chenna atan an luah mek baw a ni.

A hawngtu Rev. Remlalfaka chuan BSI Lawngtlai Branch in Building tha tak mai hawn theiha an buatsaih chu lawmawm a tih thu sawiin, Good News Centre hian Kohhran hrang hrangte phuar khawm sela, helai hmun atang hian

Bible Society rawngbawlina pawimawh tak hi phuisui leh hmasawn zawka kalpui a nih theih na'n duhsakna a hlan tih a sawi baw. Rev.Remlalfaka chuan Bible Society rawngbawlina atana sum hnar ber chu Kohhran leh mimal thahnemngaihna tling khawm a nih thu sawiin, Lal Isua la hre lote'n Bible an chhiar atangin Chhandamna an lo chang thin a, chutiang taka chhandam ngaite chhandam an nih zel theih na'n Bible Society rawngbawlina hi ngawrh taka kalpui zel a pawimawh tih a sawi baw.

Lawngtlai a Good News Centre a hawn zawh hian BCM Lawngtlai Chandmary Kohhranah BSI Lawngtlai Branch a collector-te pualin Seminar buatsaih zui a ni a. Rev. Remlalfaka chuan kalkhawmte hnenah Bible Society rawngbawlina tih thupui hmangin zirtirna a pe a, chawhnu lamah zawhna leh chhanna hun bakah, sawihona hun hman ani baw.

Rev.Remlalfaka hian Lawngtlai a cham chhungin nizan atanga zanin thlengin Lawngtlai khawpuia Kohhran hrang hrangah rawngbawlina a hmang zui a ni.

PHBS

Presbyterian Hindi Bible School (PHBS) te chuan Armed Veng Kohhran Hall-ah Zirtawpni khan Graduation Day vawi 74-na an hmang.

Tun tumah hian zirlai 17 (mipa 13, hmeichhia 4)-in tha takin an zirchhuak a, zirlaite hi Mizoram leh Mission Field hrang hrang atanga rawn kal an ni. He hunah hian Synod Mission Board Coordinator Upa Lalthahluna Ralte in zirlai ti tha te hnenah Certificate a hlan a, Rev. R. Lalhminganga, Secretary, SMB-in zirlaite fuihna thuchah a sawi. BEC Member-in Rev. Lalfakzuala'n zirlai chhuakte tawngtaisakna hun a hmang a. Zirlai aiawhin Rubilal Hembrom, Jharkhand-in thu a sawi baw. He hunah hian Nl. Jedidi Zothantluangi, Aizawl East Area Choir leh Synod Mission Choir te an zai a ni.

Presbyterian Hindi Bible School hi SMB hnuaia hnamdang ringtharte rinna kawnga tihnghehna tura a din a ni a. August 24, 1990 khan hawn a ni a. September 15, 1990-ah zirlai mi 20 nen class tan a ni. Hun kal zelah Synod chuan India ram hmun hrang hrangah Mission Field a hawng ta zel a; chuvangin, state hrang hrang leh ram pawn - Nepal leh Bhutan atangte pawhin zirlai an lo kal thin a ni. A din tan kum 1990 atanga thla thum course ni thin kha kum 1998 atangin thla ruk course-a tih sei a ni a, kum khatah batch hnih neih thin a ni.

Kum 1990 atanga June 2025 thlengin zirlai 1889 (mipa 1446, hmeichhia 443) ten tha takin an zir chhuak tawh a, zirlai titha Top 3 te hnenah lawmman cash award pek thin a ni baw.

KENBO BIKE

Hnahthial district Addl SP, Pu Lalmangaihhlua chuan Hnahthial district chhungah China siam Myanmar motor cycle 'Kenbo' khalth a khap.

Khapna thupekah hian Pu Lalmangaihhlua chuan Mizoram leh Myanmar inrina India/Mizoram bul hnai-ah India rama ziahluh ni lo Kenbo Bikes khalth thin a ni tih hriat a ni a. Hei hi Mizoram state chhungril zawkah pawh kal veivah na'n hman nasat a ni leh zel tih hriat a ni baw a. Heng kenbo bike-te hian Mizoram/India ram chhungah veivah theihna Permit/Document mumal an nei lo tih hriat a ni baw. Chuvangin, patrolling lai emaw, check point ah emaw, hunbi Operations neih lai a hmuh an nih chuan man a enfiah an ni anga, a tul anga dan anga an chungchang rel a nih tur thu a tarlang a ni.